



## Sheria kwa Yenyewe

### ni Kamilifu

**M**imi, Bwana, nasema haki; nanena mambo ya adili.—Isaya 45:19.

Kwa kuweka kando Biblia kumetokea kutanga mbali na sheria ya Mungu. Fundisho la kwamba wanadamu wako huru dhidi ya utii wa amri za Mungu, limedhoofisha nguvu ya wajibu wa kimaadili na kufungua milango ya mafuriko ya uovu ulimwenguni. Uasi wa sheria, uharibifu, na ufisadi vinaenea kama mafuriko makubwa. Kila mahali huonekana wivu, dhana mbaya, unafiki, kutokufaa, ubinafsi, ugomvi, usaliti kwa amana takatifu, tamaa mbaya. Mfumo mzima wa kanuni na mafundisho ya kidini, ambayo yanapaswa kuunda msingi na mfumo wa maisha ya kijamii, unaonekana kuwa ni wa kuyumbayumba kukuu, tayari kuanguka kuwa magofu.

Hakuna kitu kama kudhoofisha au kuimarisha sheria ya Yehova. Kama ilivyokuwa, ndivyo ilivyo. Daima imekuwa, na daima itakuwa, takatifu, ya haki, na njema, kamilifu kwa yenyewe. Haiwezi kufutwa au kubadilishwa. “Kuiheshimu” au “kutoiheshimu” ni maneno ya wanadamu tu.

Kati ya sheria za wanadamu na kanuni za Yehova kutakuja pambano kuu la mwisho katika pambano kati ya kweli na uongo. Kwenye vita hii tunayoiingia sasa—vita si kati ya makanisa yanayoshindana yanayopigania ukuu, bali kati ya dini ya Biblia na dini za hadithi na mapokeo. Mashirika ambayo yameungana dhidi ya ukweli sasa yanafanya kazi kikamilifu. Neno Takatifu la Mungu, ambalo limetolewa kwetu kwa gharama kubwa sana ya mateso na umwagaji damu, halithaminiwi sana. Ni wachache wanaokubali kweli kuwa kanuni ya maisha.

Kutoweka kwa uaminifu kumeenea kwa kiasi cha kutisha, si ulimwenguni tu, hata katika kanisa. Kumetokea wengi kuyakana mafundisho ambayo ni nguzo halisi za imani ya Kikristo. Mambo makuu ya uumbaji kama yalivyowasilishwa na waandishi waliovuviwa, anguko la mwanadamu, upatanisho, amri ya milele—haya yote yamekataliwa kivitendo na sehemu kubwa ya ulimwengu unaodai kuwa wa Kikristo. Maelfu wanaojivunia ujuzi wao wanaona kuwa ni udhaifu kuamini Biblia kikamilifu, na kama ushahidi wa elimu kukosoa Maandiko na kuyapa tafsiri za kiroho na kufutilia mbali ukweli wake muhimu zaidi.

Wakristo wanapaswa kujiandaa kwa yale ambayo yatatokea hivi karibuni katika ulimwengu kwa mshangao mkubwa, na maandalizi haya wanapaswa kufanya kwa kujifunza neno la Mungu kwa bidii na kujitahidi kuishi maisha yao kulingana na amri zake. Mambo makubwa ya umilele yanatutaka kitu kando na dini ya kufikirika, dini ya maneno na vitendo, ambapo ukweli hutunzwa katika nyua ya nje. Mungu anaita kwa ajili ya uamsho na matengenezo. Maneno ya Biblia na Biblia pekee, yanapaswa kusikilizwa kutoka kwenye mimbari (Manabii na Wafalme, sehemu ya 2. uk. 431 – 433).